

आकाशवाणी जयपुर-अजमेर
प्रादेशिक समाचार
दिनांक 28.04.2025 समय: 18.45 बजे

- प्रधानमंत्री नरेन्द्र मोदी रक्षा मंत्री राजनाथ सिंह सागे मीटिंग कर र पहलगाम आतंकी हमला अर हिफाजती इन्तजामात ऊं जुड़ी चर्चा कीनीं
- मुख्यमंत्री भजन लाल शर्मा प्रदेश मांय विरासत ने बचावण सारू जयपुर मांय राज्य स्तर रो संग्रहालय बणावण बाबत् कह्यो
- राष्ट्रपति द्रौपदी मुर्मू नई दिल्ली मांय राख्या जा रह्या जळसा मांय न्यारी-न्यारी हस्तियां ने पद्म पुरस्कार दे र नवाज़ रही हैं
- राज्य मांय घणखर ठौड़ां पारो चढ़यो-जोरदार गर्मी ने ध्यान राखता थकां स्वास्थ्य मंत्रालय री लोगां ऊं खास ध्यान राखण री अपील कीनीं

000

प्रधानमंत्री नरेन्द्र मोदी आज नई दिल्ली मांय वां रा रेहवास माथे रक्षा मंत्री राजनाथ सिंह सागे मीटिंग कीनीं करीब 40 मिनट चाली ई मीटिंग मांय पहलगाम आतंकी हमला अर वां पाछे रा हालात रा बारा मांय चर्चा करी ज्यीं ई दौरान राष्ट्रीय सुरक्षा सलाहकार अजीत डोभाल ई मौजूद हां रक्षा मंत्री प्रधानमंत्री ने हिफाजती तैयारियां अर ताज़ा हालात रा बारा मांय जाणकारी दीनीं आज ही रक्षा मामलां री संसदीय समिति री ई मीटिंग व्ही

000

भारत पहलगाम आतंकी हमला रा बारा मांय भरमावण वाळी जाणकारियां देवण रा आरोप मांय डॉन न्यूज, समा टीवी, आर्य न्यूज अर जियो न्यूज समेत 16 पाकिस्तानी यू-ट्यूब चैनलां माथे रोक लगा दीनीं हैं प्रतिबंधित चैनलां रा कार्यक्रम देखण वाळां री तादाद 6 करोड़ तीस लाख ऊं बत्ती हैं

000

मुख्यमंत्री भजन लाल शर्मा कह्यो है के राज्य सरकार सैर-सपाटा री ठौड़ां विश्व स्तर रा सुबीता विकसित करण सारू लगातार काम कर रही हैं श्री शर्मा अहलकारां ने राज्य री गौरवशाली विरासत ने बचावण रा काम माथे खास ध्यान देवण रा हुकम दीनां मुख्यमंत्री आज पर्यटन, कला, संस्कृति और पुरातत्व विभाग री बजट घोषणावां री समीक्षा बैठक मांय बोल रह्या हां वे जयपुर मांय राज्य स्तर रो संग्रहालय बणावण बाबत् ई कह्यो मुख्यमंत्री आज वां रा रेहवास माथे जनसुणवाई ई कीनीं ई दौरान वे कह्यो है के हर फरियादी री फरियाद सुण र वां रो निपटारो करणो वां री सरकार रो मूलमंत्र हैं वे जनता री शिकायतां सुण र संबंधित अहलकारां ने वां रा निपटारां रा हुकम दीनां श्री शर्मा आज नागरिक उड्डयन विभाग रा अहलकारां सागे ई मीटिंग कर र प्रदेश मांय हवाई सेवावां रा हालात माथे चर्चा कीनीं मुख्यमंत्री अहलकारां ने हवाई सेवावां ने और बधावण, अंतर्राष्ट्रीय मानकां रे मुजब हवाई सुबीतां मांय बधोतरी अर क्षेत्रीय कनेक्टिविटी मज़बूत करण रा हुकम दीनां

000

पंजाब रा राज्यपाल गुलाबचंद कटारिया आज जयपुर मांय राज्यपाल हरिभाऊ बागडे सागे मुलाकात कीनीं राजभवन मांय व्ही मुलाकात रे दौरान दोन्यू न्यारा-न्यारा मुद्दां माथे बातचीत कीनीं

000

कांग्रेस रा राष्ट्रीय अध्यक्ष मल्लिकार्जुन खड़गे पहलगाम हमला रा बारा मांय कह्यो है के सरकार इण ऊं जुड़्या जो कोई जतन करेला सगळा वां सागे रहवेलां श्री खड़गे आज जयपुर रा रामलीला मैदान मांय राख्यी ज्यी संविधान बचाओ रैली मांय बोल रह्या हां वे कह्यो के देश सब ऊं पैली हैं

.....

रैली मांय राज्य रा पैली वाळा मुख्यमंत्री अशोक गहलोत, पैली वाळा उपमुख्यमंत्री सचिन पायलट अर कांग्रेस रा प्रदेश अध्यक्ष गोविन्द सिंह डोटासरा ई विचार बतायां कांग्रेस पार्टी री ओर ऊं आज लोकतंत्र बचाओ अभियान री औपचारिक सरुआत करी ज्यीं ई पाछे श्री खडगे पार्टी रा जिला अध्यक्षां सागे मीटिंग ई कीनीं

दूजी कानी प्रदेश भाजपा अध्यक्ष मदन राठौड़ कांग्रेस पार्टी अर वां रा अध्यक्ष माथे ढोंग करण रो आरोप लगायो हैं आज जयपुर रा प्रदेश भाजपा कार्यालय मांय खबरनवीसा सागे बातचीत करता थकां श्री राठौड़ कह्यो के कांग्रेस पार्टी संविधान री हिफाजत रो नाटक कर रही है जद के वां रो व्यवहार संविधान रे मुजब नी व्हे हैं

.....
प्रेस वार्ता ने मंत्री जोगाराम पटेल अर मदन दिलावर ई सम्बोधित कीनां

000

राष्ट्रपति द्रौपदी मुर्मू आज राष्ट्रपति भवन मांय राख्यी ज्या नागरिक सम्मान समारोह मांय हस्तियां ने पद्म पुरस्कार ऊं नवाज रही हैं ई साल गणतंत्र दिवस री पैली वाळी सांझ सरकार 139 हस्तियां ने पद्म पुरस्कार देवण रो ऐलाण करी ज्यो हों आं मांय सात पद्म विभूषण, 19 पद्म भूषण अर 113 पद्मश्री पुरस्कार शामिल हैं अ नागरिक अलंकरण दो दौर मांय दिया जावेलां ई रा पैला दौर मांय आज 71 हस्तियां ने नवाजी जा रही हैं राजस्थान रा उर्दू शायर अर चिंतक शीन काफ निजाम, बैजनाथ महाराज अर लोक गायिका बतूल बैगम ने ई पद्मश्री अलंकरण दियो जा रह्यो हैं

000

लोकसभा अध्यक्ष ओम बिरला आज कोटा मांय पीवण रा पाणी ऊं जुड़ी परियोजनावां रा काम रो जायजो लेवण सारु अहलकारां सागे मीटिंग कीनीं वे कोटा-बूंदी मांय पाणी री पूर्ति रा बारा मांय विगतवार चर्चा कीनीं श्री बिरला कह्यो के जलदाय विभाग ने आवता 50 साल जरूरतां ने ध्यान राखता थकां नुवी परियोजनावां बणावणी चाहिजें वे कह्यो के प्रस्तावित औद्योगिक हलका मांय बिजली-पाणी रा सुबीता तैय कर्या जावणा चाहिजें मीटिंग मांय जन स्वास्थ्य अभियांत्रिकी मंत्री कन्हैया लाल चौधरी अर ऊर्जा मंत्री हीरा लाल नागर ई मौजूद रह्यां

000

पुणे रा हड़पूर ऊं जोधपुर बीचे चालण वाळी रेलगाडी अब पाली-मारवाड़, मारवाड़ जंक्शन, रानी, फालना अर जवाई बांध टेशनां माथे ई रुकेलां रेल मंत्री अश्विनी वैष्णव ई री मंजूरी दे दीनी हैं पाली रा सांसद पी.पी. चौधरी री कोशिसां ऊं व्ह्या ई फैसला ऊं जनता मांय उमाव हैं

000

राज्य रा पैली वाळा जलदाय मंत्री महेश जोशी री जल जीवन मिशन घोटाला मांय आज खास अदालत मांय पेशी व्हीं 900 करोड़ रुपया रा घोटाला री शंका वाळा ई मामला मांय प्रवर्तन निदेशालय-ई.डी. श्री जोशी ने 24 अप्रैल ने गिरफ्तार कीनो हों वां री रिमाण्ड री मियाद आज खत्म व्हे रही हीं ई बीचे आज श्री जोशी री जोड़ायत कौशल देवी रे जयपुर रा एक अस्पताल मांय देवलोक व्हे जावण रे कारण अदालत वां ने चार दिन री अंतरिम जमानत दीनी हैं

000

प्रदेश मांय आखा तीज अर पीपल पूण्यू रा अबूझ सावा रे मौके बाळाक जोड़ा रा ब्याह री शंका ने ध्यान राखता थकां पुलिस सावचेती बरत रही हैं दूसरी ओर पुलिस री ओर ऊं खास अभियान ऑपरेशन लाडली चलायो जा रह्यो हैं अतिरिक्त पुलिस महानिदेशक मालिनी अग्रवाल बतायो के पुलिस गांवांई हलकां मांय जनता रा नुमाइन्दां सागे बाळक जोड़ा रा ब्याह रे खिलाफ जाग जगा रही हैं

.....
राज्य मांय बाळक जोड़ां रा ब्याह रोकण सारु जनता मांय जाग जगावण रो अभियान चलायो जा रह्यो हैं पाली मांय आज जिला विधिक सेवा प्राधिकरण री ओर ऊं आंगनबाड़ी कार्यकर्तावां ने

बाळ—पणा मांय ब्याह रा नुकसाण री जाणकारी दीरीजीं पहले पढाई—फिर विदाई संदेश सागे समझाइश ई करी ज्यीं ई सागे ई बाल—विवाह मुक्त राजस्थान री सौगंध दिरायी ज्यीं डूंगरपुर मांय चलाया जा रह्या जागरूकता अभियान मांय धर्म गुरुआं री ई मदद ली जा रही हैं

000

प्रदेश मांय पारो चढ़बा ऊं घणखर ठौड़ां गर्मी रो असर और बध ग्यो हैं बालोतरा, बाड़मेर, जैसलमेर अर जालौर मांय आखा दिन बाज रह्या उन्ना बायरा ऊं लोग परेशान रह्यां मौसम विभाग रे मुजब लारला चौबीस घंटां मांय बाड़मेर मांय 46 दशमलव 1 अर जैसलमेर मांय साढे 45 डिग्री सेल्सियस तापमान रह्यो श्रीगंगानगर, जोधपुर, फलौदी अर चित्तौड़गढ़ मांय ई पारो 43 डिग्री सेल्सियस ने पार कर ग्यो राज्य मांय घणखर ठौड़ां अधिकतम तापमान 40 डिग्री सेल्सियस ऊं ऊंचो रिकॉर्ड करी ज्यो महकमा रे मुजब जोधपुर अर बीकानेर संभाग मांय जोरदार गर्मी अर लू रा हालात बण्या रेहवण रा आसार हैं आवता महीना रा पहला सप्ताह मांय आंधी—बारिश री संभावना हैं आं दिनां पड़ रह्या जोरदार तावड़ा अर लू ने ध्यान राखता थकां सगळां ऊं तबियत रो खास ध्यान राखण री अरज हैं बाहर जाती बगत खास सावचेती राखो सां तावड़ा मांय बाहर जाती बगत माथो ढक र राखणो चाहिजे अर टेम—टेम परां पाणी अर दूजी चीजां पीणी चाहिजे चमड़ी लाल सुर्ख व्हेवण या शरीर उन्नो व्हेवण, जोरदार माथो दुखण अर मांसपेशियां मांय ऐंठन व्हेवण, घबराहट व्हेवण या उल्टी आवण परां तुरत पाणी पीवणो चाहिजे, छायादार अर हवादार ठौड़ां आराम करणो चाहिजे, गर व्हे सके तो नहावणो चाहिजे अ लक्षण लगातार बण्या रेहवण या हालत गंभीर व्हेवण परां तुरत डॉक्टर कने जावणो चाहिजे या एम्बूलेंस बुलावणी चाहिजे

000